



• EDITORIAL • RÂL VÊNGTU • CHHÛNGKAW CHANCHIN

- » 56th KṬP General Conference, Champai
- » MSSU-in India rama Sunday School ṭha zual zir chiang
- » Hmangaihna In kum 30 tlin lawmna hun hman a ni

RNI 68092/83 Regn. No. N.E. 1024
From
Synod Literature & Publication Board
Synod Office, Aizawl - 796 001
Mizoram. Phone: 0389-2324590

SYNOD *Newsletter*

Volume XXX

No. 390

E-mail: synodnews@gmail.com

MARCH, 2016

LÂWRKHÂWM

SYNOD EXECUTIVE COMMITTEE VAWI 262-NA TLUANGTAKA ZAWH A NI

RAMTHAR FIELD THAR HAWNG

Synod Inkhâwmpui 2015 in Field thar hawn chungchâng Synod Mision Board kuta a dah chu Ramthar Board Executive in ruahmanna a siam angin hetiang hian hawn a ni – Arunachal ‘N’ Field-a Aalo-ah ni 12.3.2016-ah Rev. B. Sângthanga, Executive Secretary-in a hawng a, Odhisha Field, Bhubhaneshwar-ah ni 18.3.2016-ah Rev. H. Lalrinmawia, Moderator-in a hawng baw.

CAMPUS MINISTRY

February 23, 2016 (Thawhlehi) khan Govt Chaltlang Higher Sec. School te Ramhlun Indoor stadium-ah “*Illuminating the Mind*” tih thupui zirhona an neihpui a. Programme hi hun hnih ah then niin hun hmasa hi Director Rev. Lalchungnunga’n kaihruiin Campus Ministry rawngbawlina chanchin a sawi a, hemi hnuah Resource person Rev. Zoramsanga’n a paper ‘*Christianity Among Other Worldviews*’ tih chu ngaihnaawm leh bengvar thlak takin a present a, chumi hnuah zaithiam Israela Pachau in fakna hla thiam takin a sa a ni. Chawhnu hun hi Bethel Ministry lamin kaihruiin Praise and Worship a bultan a ni a, Pathian faka zaihona hun hman hnuah Resource Person Dr. Rohmingmawii, Asst. Professor, PUC in ‘*Peace of Mind: An Inter-Religious Dialogue*’ tih chu ṭha takin a present leh a, Praise and Worship a hun hman zui leh a ni. He hunah hian zirlai eng emaw zatin Pathian tan inhlatharna hun an hmang thei a ni.

SYNOD OFFICE HOURS

Synod Office kai hun hetiang hian tih danglam a ni : March 1, 2016 - September 30, 2016 thlang zing dâr 9:30-ah ṭanin tlai dâr 5:00-ah an bâng

- Kum 2015 Synod Inkhawmpuiin SEC bawh zui tura a dahte bawh zui a ni
- Kristian Ṭhalai Pawl Leader leh General Secretary ruat thar an ni

Synod Executive Committee (SEC) vawi 262-na chu Synod Calendar-a dah lâwk angin a hun takah February 23 – 25, 2016 chhûng khân J.M. Lloyd Hall, Synod Office-ah an ṭhu a, Committee member an kal ṭha hle. Dam lohna thil leh harsatna bik avânga kal thei lo paruk tih loh chu an kal thei vek a; member 135 an kal thei. Kum kal ta 2015 Synod Inkhawmpuiin SEC bawh zui tura a dahte bawh zui a ni ber a, ruahmanna leh zir chianna kalpuia lo khawih hmasa tûr, Committee te chi hrang 15 laiah siam a ni a; chûng mite chuan ruahmanna chi hrang hrang siamin SEC-ah an thlen leh a ngai dawn a ni. Chûng thu pawimawh bik zir chianga ruahmanna nêna SEC a thlen leh tura tih ṭhenkhatte chu:

1. Mizorama Kohhrante inpumkhatna kawng zawn thu,
2. Synod Higher Secondary School building leh ram behchhana College hawn chungchâng,
3. Minister/Pro. Pastor thawk lai thi nupui fanaute tâna chhawmdâwlina siam dân tûr,
4. Fa pali nei chin leh a aia tam neite ṭanpuina pêk dân tûr,
5. Minister mahni duh thua Synod Service chhuahsante chungchâng kalpui dân tûr,
6. Kohhran indang tharte din ṭan ni tihchian thu,
7. TA/DA, Sitting Allowance, Pastor/Pro. Pastor in luah man leh Pêm Hruai Dân ennawn,
8. Youth Empowerment Programme kalpui rawtna,
9. Synod Administrative set up & management enṭhat,
10. Nupa Chungchâng Dân enṭhat,
11. Ruihhlo ngaite enkawlina hmun khata pawh khâwm dân tûr chungchâng te an ni.

Tin, hêng bâkah hian Department-in an lo bawhzui tûr thu ṭhenkhat dah a awm nual baw a. SEC-in a rêl fel nghal a awm nual baw a. Chûng khawih nawn ngai lova rêl fel nghal zînga ṭhenkhatte chu-

1. Baptist Church of Mizoram (BCM) nena inpalai tawn chungchâng : Inpalai tawn

rem kan tih chu Baptist Church of Mizoram (BCM) te hriattîr ni se tia rêl a ni.

2. Synod PPF Board of Trustee-ah Synod Hospital Director leh thawktu aiawh tel tura rêl a ni .

3. Central KṬP Leader leh General Secretary ruat thar a ni a, Leader atân Rev. Zothansânga, Luangmual leh General Secretary atân Upa Zonunmawia, Co-ordinator, KṬP ruat an ni.(Kum 2016-2018 KṬP General Conference thlang an ṭang ang)

4. Kum 2016 Khawvêl Sunday School Nî a NPSS zir tûr atân C.T Studd chanchin thlan a ni a, a ziak tûrin Pu Lalhruiatluanga Râltê, Manager, Synod Press chu ruat a ni.

5. Dân bu ṭhenkhat chhut belh thu : Dân bu ṭhenkhat – Financial Rules, leh PCI Dân Bu te sem tûr a awm tawh loh avângin kan mamawh tâwk chhut belh tura rêl a ni a. SL&PB te bul tumin PRESCOM te nen hma lo la tura tih a ni.

6. Chorei Hla Bu siama KHB-a mi hla 310 dah an rawn dîlna chu remtihsak an ni.

7. Pu Joseph Lalrammuana inenkawlina sênsô pêksak chungchâng: Synod Bangla Pui Inchung siam ṭhatu Pu Joseph Lalrammuana, Republic Vêng chu a hnathawh laiin ni 2/2/2016 khan in chung aṭangin a tla a, tûn thlang hian a zun leh êk pawh hre lovin a la awm a. Synod Hospital-a inenkawlina sênsô ₹ 54,530/- (cheng sîngnga sângli zanga sawmthum) chu pêk sak remtih a ni baw.

Phek 2-na hnuailamah chhunzawm...

SYNOD Newsletter

EDITORIAL STAFF

Rev. Dr. C. Chawngmingliana

Rev. PC Pachhûnga

Upa H. Ronghâka

Rev. R. Laldinthara

Editorial

NGAIHDAMNA

Good Friday thla a lo inher chhuak leh ta. He hunpui a lo thlen hian Kristiante chuan rinna mitthlain Gethsemani huan leh Kalvari tlâng a fang kual lo thei lo. Mizo zînga ringtu hmasate kha Ram Thianghlimah an kal lo; mahse, an rinna mit chuan an va hmu Chiang si êm! Rev R. Dâla chuan, “*Gethsemani-a thlansa kha kan theihngihl e,... Aw Lalpa, min entîr leh la, tuarpui tûrin min pui ang che,*” tiin hla a lo phuah a; Pu Rokunga pawhin, “*Eng vânga tuar nge maw? Tu tâna fam nge maw? Ka sual kaidum silfaina chuan Pathian thisen a bua,*” an ti ve hnâp baw a. Gethsemani-a a thlan thisena a far kauh kauh lai leh Kalvari tlâng Kraws-a a thisen a dir zar zar lai khân an awm ve a nih ngei hi tih a mawi a ni.

Rom sipai ten dimna tel hauh lo va an sawisak lai khân Lal Isua chuan, “Ka Pa, anni hi ngaidam rawh, an thil tih sual hi an hre lo a ni,” tiin amah sawisatute tân ngaihdam a dilsak a. Kan sual kaidum silfaina tûra Pathian theisen bua chuan vûr aia vârin min tithlianghlim a, lei leh vârin min suih zawm a, vârin khuah leh tui min nih tîr a, kan sual zawng zawng min ngaidam ta. Chu ngaihdamna changtute chuan a hniakhnung zuiin kan inngaidam tawn tûr a ni. George Herbert-a chuan, “Mitin hi ngaihdam ngai vek kan ni,” a ti a, ngaihdamna mamawh lo khawpa famkim kan awm nahek lo. Thil tisualtute ngaihdam hi thil harsa tak ni mah sela, ngaihdamna changtu thinlung erawh chu chhut kehin a awm thîn. Wellington-a kha a sipai pakhatin a phatsan a, hremna chi tinrênga an hrem hnu pawhin chupa chuan a rilru a lamlet thei lo va, tihlum mai thain an hria a. Lal hnêna an rawn hruai chuan lal chuan a lo ngaidam hmiah mai a. Chupa chuan vawikhatmah a phatsan leh tawh ngai lo. Ngaihdamna chuan thil a va tithei êm! Mihring rilru sak ber pawh a sawp zawi vekin a hneh thei a ni. Pathianin Kristaa min ngaidam ang baw khân inngaidam tawn zêl thei ila a va nuam dawn êm!

56TH. KṬP GENERAL CONFERENCE 2016

Mizorama thalai inkhâwmpui lian ber Kristian Thalai Pawl (KṬP) General Conference Vawi 56-na, New Champhai Field-a nghah chu March 3, 2016 zan aṭang khân ṭan a ni a. Conference hian March 6, 2016 (Pathianni) zan thleng a awh a ni.

KṬP General Conference vawi 56-naah hian thupuih ‘*Pathian Kohhran*’ (Mat. 16:18,19) tih hman a ni a, Speaker chu Rev. Vanlalbêla, Bâwngkâwn a ni.

February 23, 2016 zân khân Conference puala Souvenir buatsaih ‘*Sawmfâng*’ tih chu an lo tlangzarh tawh a, February 26, 2016 zânah pandal hlanna inkhâwm neiin, March 3, 2016 khân Palai lawm & Report inkhâwm neih a ni a, inkhâwm hi Central KṬP Leader Rev. J. Lalremsiama’n a kaihrui a. Rev. B. Sângthanga, Executive Secretary i/c KṬP chuan KṬP Kum Puan 2016-2017 hlânin a hawng a, kum puan atân hian ‘*Pathian nêna lendun*’ tih thlan a lo ni tawh a, Kum Puan Kaihhruiaina Booklet siam a ni baw. Upa H. Ronghaka, Synod Secretary-in Synod Choir Music Video tlangzarhna leh hlanna a nei baw. March 4, 2016 (Zirtawpni) chawhma dar 10:00 khân Synod Moderator Rev. H. Lalrinmawia kaihhruiain 2016-2018 CKṬP Hruaitu tûr thlanna neih a ni a, dâr 11:00 aṭangin Champhai Vêngthlang Kohhran Biak In-ah Rorêl Inkhâwm neih a ni baw.

Tun ṭumah hian General Agenda 9 chhawpchuah a ni a, kum 2016-2017 Central KṬP Budget ruahmanna leh Bial Budget ruahmanna te pharh niin Rorêl inkhâwm hlân hian Pandal-ah Ramthar hawi programme hman a ni a, Rev. P.C. Lalropuia, Kolkata hnên aṭangin Pathian thuchah ngaihlak a ni. Chawhnu lamah Rev. Lalparchhuana, Organising Chairman hnên aṭangin Pathian thuchah ngaihlak a ni.

Zân Pathian biak inkhâwmah Synod Moderator Rev. H. Lalrinmawia’n Pathian thuchah a sawi a, inkhâwm bânah Fellowship a awm zui nghal baw. March 5, 2016 (Inrinni) chawhmaah ‘*Rilru Hrisel*’ tih thupui hmangin T.Upa Dr. C. Lalhrekima, Mission Vêngin thuchah a sawi. Chawhnu aṭangin Variety Programme hman niin Upa K. Rorêlkima, Committee Member hnên aṭangin thuchah taw, ‘*KṬP, Kohhran kut ke*’ tih thupui ngaihlak a ni. Zan lamah Speaker hnen aṭangin thuchah ngaihlak a ni.

He inkhawmpui hi ni 5.3.2016 (Pathianni) zan khan a ṭiak a ni.

MODERATOR KOHHRAN TLAWH PROGRAMME

3-7 March, 2016	KṬP General Conference
11-13 March, 2016	Zoram Hmeichhe Rorel Inkhawmpui
18-21 March, 2016	Bubaneswar & Odhisa Field thar hawn
24 March, 2016	Khawbung Kohhran tlawh
25 March, 2016	Khuangthing & Zawlsei Kohhran tlawh
26 March, 2016	Samthang Kohhran tlawh
27 March, 2016	Khawbung Vengpui Kohhran tlawh
28 March, 2016	Lungkawlh Centenary hmanpui
29 March, 2016	Bangla Veng Kohhran tlawh

Phêk hma chhunzawmna...

Financial Year kal mêka Synod sum dinhmun khaikhâwmna hetiang a ni:

BUDGET KHUMNA/PHAKLOHNA (Hmuhna lam)

Budget	2015-2016	Hmuh zat	Budget khum/
Head	Budget	(Apr-Jan. 16)	phak lohna
Pastoral	93,43,12,000	69,15,29,342	(-)24,27,82,658
Mission	77,48,53,000	54,90,67,709	(-)22,57,85,291
Total	1,70,91,65,000	1,24,05,97,051	(-)46,85,67,949

HMUH LEH HMAN KHAIKHAWMNA (Apr 2015 - Jan 2016)

Hmuhna	Pastoral	Mission	Total
Opening Balance	38,85,27,901	35,96,88,744	74,82,16,645
Total Receipt	69,15,29,342	54,90,67,709	1,24,05,97,051
Total	1,08,00,57,243	90,87,56,453	1,98,88,13,696

Tûn pawisa kum kal mêkah hian Budget-a kan hmuh tum kan la hmu phâk lo viauin a lang a. Mahse, March thla a lo ral meuh chuan Pathian zârah kan Budget chu kan khûm leh thei tûrah beisei ila.

Râl Vêngtu

Mite chuan, “Râl Vêngtu, sakawlh chungchâng hi min han hrilh Chiang deuh teh. A thenin Presbyterian Kohhran hi an hmu sakawlh a, a thenin India sawrkar, a thenin UID, a thenin WCC an hmu sakawlh baw a. A khawi ber hi nge maw sakawlh chu ni ta le?” an ti a. Râl Vêngtu chuan, “Khaw pakhat khawhar inriak te chuan thlahrâng thâwm thang an hre zan tin ta mai. A châng leh ban a rawn sâwi a, a châng leh inhnuai aţangin dâp chhuat a rawn hrût kual baw a. Chu thlahrâng chu an hlauin khawtlâng chu an râlkhel a ni ta ber a. Tlangvâl pahnih huaisen fâl deuh te chuan chu thlahrâng chu man tumin an châng ru ta a. An han finfiah nâk chuan – zân rehah, bawngpa tuai hian thlêng silna dâp chhuat hnuai lam bâl al hi a lo liak thîn tih an hre ta a,” a ti a. Mite chuan, “Râl Vêngtu, sakawlh chungchâng thu sawi lo va thlahrâng thu i sawi teh daih le,” an ti a. Râl Vêngtu chuan, “Ka thawnthu sawi kha sakawlh nên inzawmna a nei tlat asin. Sakawlh hlauho hi chuan sakawlh ni a an rin hi an han sawi sakawlh thla ngawt zel a. Han chhui chian tak tak chuan an sawi kawlh ang em em chuan sakawlh an puha te hi an lo kawlh lem hlei lo va. An hriat chian loh avang hian an duh duh hi an sawi sakawlh mai mai a ni. Khawhar inriak tlangvalho pawh khan an finfiah loh avang khan bawngpa tuai kha thlahrâng emaw tiin an sawi hrâng mai mai a nih kha. Kan Bible-in sakawlh a tih chu, Kohhran, UID, WCC etc ni lovin Pathian leh a Kohhranho tiduhdaha chawkbuaite hi an ni asin. Kohhran hmu sakawlhute hi chu sakawlh aiin an kawlh fe zawk, hlau hle zâwk rawh u, an bulah pawh fîmkhur hle ang che u, an dangnâlah in tawlh thlu palh ang e, an sawi apiang pawh awih suh u,” a ti a. Mite chuan, “E!! Râl Vêngtu, kan harh hawk mai, kan la rawn kâwm leh thîn ang che,” an ti a.

SYNOD HELPLINE

Synod Helpline No. 9862374232
ni thîn chu hotu lam inthlâk
avângin 9436142643 hman
tawh zâwk tûr a ni.

SYNOD HOSPITAL, DURLÂNG JANUARY, 2016 CHHÛNGA THILPÊK DAWNTE

I. CHARITY FUND

1. Junior Dept, Zemabâwk Vêngthar Koh. NPSS	₹	1,300
2. KTP, Kelkâng Branch	₹	7,610
3. KTP, Suangpuiâwn Bial	₹	3,500
4. KTP, New Sêrchhip Branch	₹	7,500
5. KTP, Lungsum Branch	₹	2,000
6. Pi Lallianpuii, Leitan	₹	2,000
7. Upa Dârchhûnga & Sapiani, Armed Vêng North	₹	3,000
8. UPC (NEI), Zemabâwk Middle School Vêng	₹	2,000
9. Zoram Kohhran Hmeichhia		
Inkhâwmpui Lian - 2015, Mamit	₹	20,000
10. Khawnai Kohhran	₹	1,000
11. Pu Lalramena Râltê, Durtlâng Kâwn Vêng	₹	1,000
12. Pu Laldanglova, Durtlâng Mêl - 5	₹	1,000
13. Pu Rosawmliana Vârtê, Durtlâng Leitan	₹	1,000
14. Lungdai Kohhran	₹	1,000
15. KTP, Mamit Bial	₹	4,000
16. Pi Lâwmzuali, Lêngpui Vênglai	₹	500
17. Khawhai Kohhran	₹	1,460
18. Pu Zonundanga te nupa, Zârkawt	₹	3,500
19. Dinah Malsâwmtluangi, Chawnpui	₹	1,000
20. Champai Kahrawt Kohhran	₹	13,450
21. Pu Lalsanglûra, Durtlâng Mêl - 5	₹	1,000

II. GRACE HOME TÂN THILPÊK PETUTE

1. Chekâwn Vênglai Kohhran Hmeichhia	₹	1,550
2. Khawzawl Kohhran Hmeichhia	₹	5,000

III. THISEN PE TE

1. KTP, Saikhamakâwn Branch	35	Units
2. SCMI, ATC, Durtlâng	46	Units
Total	71	Units

PEK ZÂT

IV. THIL DANG PE TE

1. Albert Rualthankhûma & Baby, Bûngkâwn	NICU tan Drawer lian tha tak
2. Hunthar Vêng Kohhran Hmeichhia	Dialysis Unit tân Electric Blanket 2
3. Pu K. Dârthanga, Republic Vêngthlang	Damlo tân damdawi chi hrang hrang
4. Pu Vânlalzawna Râltê & family Ramhlun Vêngthlang	Chapel-a hman tûr Holy Bible
5. Pu Lallianhmuaka, College Vêng, Aizawl	Choka-a hman tûr Room Heater
6. Jayden Lalnunhlua, C/o Vanlalrawna, Dam Veng	Naupang Ward tân Flask

Khawngaihna leh duhsaknaa thilpêk min petute zawng zawng hnênah Lalpa Isua Krista hmingin lawmthu kan sawi tak meuh meuh a ni. Hêng in thilpêk kan dawnte hian damlo awm man harsate thlamuang takin a awmtîr a, Hospital mamawh tam tak min phuhrûsak baw a ni.

Sd/- REV. R. RAMDINMAWIA
Chaplain, Synod Hospital, Durtlâng

MSSU-IN INDIA RAMA SUNDAY SCHOOL THA ZUAL ZIR CHIANG DAWN

March 4 - 23, 2016 chhûng hian India ram khawpui hmun 5-ah India rama Sunday School nei tha zual thenkhat zirchianna nei tûrin Pu Lalthahluna Râltê, Asst. Coordinator leh Rev. Dr. Hmingthansânga, Synod Office te an kal. March 7, 2016 (Thawhtanni) ah San Thoma Sunday School, Chennai tlawhin, March 9, 2016 (Nilaini) ah Mar Thoma Sunday School Samajam, Kerela tlawh leh in, March 11 & 12, 2016 ah India Sunday School Union, Coonoor an tlawh baw. March 15, 2016 ah Christian Education Department of Evangelical Fellowship of India (CEEFI), Hyderabad tlawh lehin, March 17 - 19, 2016 chhungin All India Sunday School Association (AISSA), Nagpur an tlawh leh baw. Heng an tlawh te aţang hian zirlai leh a kaihnhawih (Teaching Aids, etc..) an siam dân te, Mizo Sunday School Union-in Beginners Dept aţanga Senior Dept zirlai lesson plan enţhat mêk atâna ţangkai tûr awm te an zir Chiang a ni.

SERAMPORE COLLEGE CONVOCATION

Senate of Serampore College (Univ.) Convocation February 5, 2016-a Andra Christian Theological College (CTC), Hyderabad-a ngahah Rev. Lalramliana Pachau, Sr. Executive Secretary chu Senator a nih angin a tel a, ATC Principal Rev. Dr. C. Lalhlîra leh degree dawng tûr zirlai thenkhat kal an awm baw.

WORSHIP DEPARTMENT

Synod School of Music hnuaiah Tonic Solfa & Staff Notation (Morning Class) chu March 1, 2016 aţang khan kalpui ţan a ni a, tûnah hian zirlai 85 an awm a ni.

Synod School of Music hnuaiah hian April - June, 2016 chhûnga Tonic Solfa & Staff Notation (School naupang tân, 3-5 pm) leh Violin Class hawn a ni leh dâwn a, dîl duhte chuan Worship Department, Synod Office aţangin dîlna form lâk theih a ni a, March 29, 2016 ral hma ngeiin thehluh leh tûr a ni. Dîlnaah hian mahni awmna Kohhran lehkha thil tel tûr a ni. April 5, 2016 aţanga class ţan tûr a ni ang.

PATHIAN THU ZIR DUH TÂN

Presbyterian Bible School, Mission Vêng, Aizâwlah C.Th (Certificate in Theology) zir tûr lâk a ni dâwn a. Admission Form Office-ah ₹ 10-a lei tûr a ni a. Dîl duh chu chuan hêng hi hriat tûr a ni e:

Dîl theih

hun chhûng : April 29, 2016

Thlâi dâr 3:00 thleng

Dîl thei chin : Class VII passed, kum 16 aia naupang lo, Kohhran dân chhûnga awm.

Interview : May 3, 2016. Zîng dâr 10

Lâk te chuan May 5, 2016 aţangin class ţan tûr a ni a. Zir hun chhûng hi May-August, 2016 a ni. Hrechiang duh tân Phone No. 2317343/2325082/9436198231.

Sd/- Rev. Lalneihvûra
Principal
Presbyterian Bible School

SÂWMNA

- Ni 4-10 April, 2016 hian Mizoram Presbyterian Kohhran, Sevenphûl chuan Silver Jubilee lawm an tum a. He Kohhrana lo lawi tawh zawng zawng leh Bialtu Pastor leh Pro Pastor lo ni tawh zawng zawngte lo tel vek tûrin an sawm.
- Lungchhuan Kohhran Biak In thar chu ni 8 April, 2016 (Zirtawpni) hian Rev. H. Lalrinmawia, Synod Moderator-in a hawng dawn a. He Biak In thar hawn hun hmanpui tûr hian Lungchhuan Kohhrana lo lawi tawh zawng zawng te, Lungchhuan khaw chhuak hmun hrang hranga awm te, Bialtu Pastor leh Pro Pastor lo ni tawh zawng zawngte an sawm a ni.
- Vaṭhuampui Pastor Bial chuan ni 23 April, 2016 hian Silver Jubilee a lawm dawn a. He hun hmanpui tûr hian Vaṭhuampui Pastor Bial chhunga Pastor leh Pro Pastor lo ni tawh zawng zawng leh Missionary-a thawk tawh zawng zawng bakah Bial chhunga lo awm tawh zawng zawngte an sawm.
- March 21-23, 2016 hian Bûngzung Presbyterian Kohhran chuan Biak In thar a hawng dawn a. Bungzung khaw chhuak leh he Kohhrana lo lawi tawh zawng zawngte he hun hmanpui tûr hian an sawm.
- Palsang Kohhran chuan 30-31 March, 2016 hian Centenary an lâwm dawn a. He hun hmanpui tûr hian he Kohhrana lo lawi tawh zawng zawng leh Pastor leh Pro Pastor awm tawh zawng zawngte an sawm a ni.
- Darlawn Chhimvêng Kohhran Biak In chu ni 2 April hian Rev. H. Lalrinmawia, Synod Moderator-in a hawng dawn a. He hun hmanpui tûr hian an Kohhrana lo lawi tawhte leh Pastor leh Pro Pastor awm tawh zawng zawngte an sawm.

PRESBYTERIAN HMEICHHE HOSTEL HRIATTIRNA

Pawl 11 zir tûr, kum 2016-2017 chhunga Presbyterian Hmeichhe Hostel a awm duh tân ni 11.5.2016 thleng dîl theih a ni.

Interview hun : 12.5.2016: 11:00am

A hmun : Synod Committee Room-I

Seat awm zât : Seat 18

Dilna Form chu Kohhran Hmeichhe Department, Synod Office-ah leh Warden, Presbyterian Hmeichhe Hostel, Kulikâwnah lâk theih a ni.

HMANGAIHNA IN KUM 30 TLIN LAWMA NEIH A NI

Ni 19 February, 2016) chawhnu dâr 1:00 khân Hmangaihna In, Durtlâng kum 30 tlin lawma hun hman a ni.

Programme hi Hmangaihna In Recreation Room-ah hman a ni a, Management Committee Chairman Pi Rinchawiin programme a kaihrui. Superintendent Pi Laldawnkimi hnên aṭangin Inhmelhriattirna leh Reports ngaihthlâk a ni a, Home Naupangten Special Item ngaihnaawm leh hmuhnaawm tak tak an entîr a, Durtlâng Kohhran Female Voice te an zai baw.

Rev. P.C. Pachhûnga, Executive Secretary in thusawina hun a hman a, Pu James Lalthangmawia, DCPO, Aizawl District hnên aṭangin thusawi tawi ngaihthlâk leh a ni a, a duh apiang thusawina hun hawn a ni baw. Programme hman zawh hian a lawma zanriah an kilho ngal a ni.

Hmangaihna In hi kum 1980 Synod Inkhâmpuiin Synod huapa Nau Hnuchham Enkawlna neih nise, SEC in chak zâwkin lo bawhzui rawh se, tiin a rêl a, Sub-Committee siamin hma lâk zui ngâl a ni a, Synod Hospital Compound-ah a building hi sak niin, February 15, 1986 ah hawn a ni. Kum 2011 aṭang khân naupang 50 awm theihna tûra siam a ni a. A tirah chuan kum 2 hnuai lam tân a ni a, kum 4 chin tân tih a ni leh a, kum 2011 aṭangin kum 6 thleng enkawl theihna a ni.

A din tirh aṭanga naupang admit tawh zawng zawng zât chu mi 396 an ni a. Naupangte hi hnam hrang hrang - Mizo, Vai, Chakma leh Bru an ni ber a, Kristian Kohhran pawl hrang hrang leh Hindu, Muslim leh Buddhist te an ni. Tûnah hian mipa 9 leh hmeichhia 16, an vaiin 25 an awm mêk a ni.



MISSION BOARD

- February 25, 2016 aṭang khân Field Committee leh Field Visit nei tûrin Rev. K. Lalrinmawia, Synod Mission Board Secretary; Upa C. Lalngâklianah leh Rev. T.C. Laltanzova (Board Executive Committee Members) te an kal. February 29, 2016 khân Kolkata Field Committee an ṭhu a, March 3, 2016 khan Siliguri Field Committee an nei leh a, March 7, 2016 khân Nepal Field Committee an ṭhu leh baw.
- Chawnpui Masihi Sangati buatsaihin February 28, 2016 hmanin Bial chhunga hnamdang ringlote pual Crusade, Zotlang Kohhran Biak Inah an hman a, Speaker atân Upa Lalhmingthanga, Hunthar hman niin Synod Gospel Team ten Counselling an buaipui baw. Crusade hmanthu hnamdang 63 zîngah mi 8 in baptisma an chang thar a ni.

Sam 130:7

Aw Israel-hote u, LALPA chu beisei rawh u;

LALPA hnênah chuan ngilneihna a awm si a,

A hnênah tlanna tam tak a awm baw a.